

南
北
史
合
注

原缺

賴大將軍侯伏侯壽等救護以免後襲爵隋國公武帝
既為皇太子甥公長女為妃益加禮重齊王憲信於帝
曰普六茹堅相貌臣每見之不覺自失恐非人下請早
除之帝曰此止可為將耳內史王軌驟諫曰皇太子非
社稷主普六茹堅有反相

賜姓見皇考忠傳

三國典略曰軌以隋公堅相異因入侍武帝晏佯醉
撥去堅頭上帽曰是何物頭額又皇甫某見堅舉手

自拍其額武帝謂公曰皇甫道公額也

帝不悅曰必天命有在將若之何公甚懼深自悔匿後
從帝平齊進柱國又與齊王憲破齊任城王浟於冀州
除定州總管先是州城門久閉不行齊人白文宣時或
請開之文宣不許曰當有聖人啟之及公至而開之莫
不驚異遷亳州總管宣帝卽位以後父徵拜上柱國大
司馬大象初遷大後丞右司武俄轉大前疑帝每巡幸
恒委以居守時宣帝為刑經聖制其法深刻公以法令

滋章非興化之道切諫不納公位望益隆帝頗以為忌時帝四幸女並為皇后爭寵相毀帝每謂后曰必族滅爾家因召公命左右曰若色動即殺之公容色自若遂免大象二年五月以公為揚州總管將發暴足疾而止已未帝不豫時靜帝幼冲前內史上大夫鄭譯御正大夫劉昉以公后父衆望所集遂矯詔引公入侍疾因受遺輔政都督內外諸軍事公恐周氏諸藩生變稱趙王招將嫁女於突厥為辭徵之己酉宣帝幼庚戌天子詔

公假黃鉞左大丞相百官總已而聽以正陽宮為丞相府以鄭譯為長史劉昫為司馬具置寮佐宣帝時刑政峻酷者悉更以寬大之制天下歸心矣

天命論曰帝嘗出長安城東獵馬上思濟生民夜夢一長大人素服冠幘謂曰時未至及欲作相夢人曰時至矣

六月趙王招陳王純越王達代王盛滕王道並至長安相州總管尉遲迥自以宿將心不能平遂舉兵趙魏之

士響應旬日間衆至十餘萬宇文曹以榮州石懸以建
州席毗以沛郡毗弟又羅以兗州皆應迴遣子質於陳
以求拔公命上柱國鄭公韋孝寬擊之雍州牧畢王賢
及趙陳等五王謀殺公公執賢斬之而掩趙王等不問
因詔五王劍履上殿入朝不趨以安之時五王陰謀滋
甚公以酒肴造趙王觀其指趙王伏甲臥內公賴元曹
免於是害趙越二王八月庚午韋孝寬破尉遲迴斬之
傳首闕下餘黨悉平初迴之起兵鄖州總管司馬消難

據州應迴淮南州縣多從之襄州摠管王誼攻之消難
奔陳荆郢羣蠻乘釁而起命亳州摠管賀若誼討平之
先是上柱國王謙為益州摠管亦擁衆巴蜀以匡復為
辭公以東夏山南為事未遑興師謙遂屯劍口臨始州
至是乃命上柱國梁睿往平之傳首闕下隳劍閣之險
以絕亂萌九月壬子天子進公大丞相十月詔追贈公
曾祖烈為柱國太保都督十州諸軍事徐州刺史隋國
公謚曰康祖禎為柱國都督十三州諸軍事同州刺史

隋國公謚曰獻考忠為上柱國太師大冢宰都督十三州諸軍事雍州牧壬戌害陳王純天子進公大冢宰五府總於天官十一月辛未害代王達滕王道十二月甲子天子授公相國摠百揆去都督內外諸軍事大冢宰之號進爵為王以隋州之崇業鄭州之安陸城陽溫州之宜人應州之平靖上明順州之淮南士州之永川昌州之廣昌安昌申州之義陽淮安息州之新蔡建安豫州之汝南臨潁廣寧初安蔡州之蔡陽郢州之漢東二

十郡為隋國劍履上殿入朝不趨贊拜不名備九錫之禮加璽紱遠遊冠相國印綠綬綬位在諸侯王上隋國置丞相以下一依舊式王再讓乃受王爵辭十郡天子詔進王曾祖祖考爵並為王夫人為王妃

大定元年二月壬子下令曰以前賜姓皆復其舊甲寅王受九錫之禮

魏徵隋書載策曰咨爾隋王天覆地載藉人事以財成日往月來由王道而盈昃五氣陶鑄萬物流形誰

代上玄之工斯則大聖而已曰惟先正翊亮皇朝種
德積善載誕上相精采不代風骨異人匡國濟時除
凶撥亂百神奉職萬國宅心殷相以先知悟人周輔
乃弘道於代方斯蒞如也今將授王典禮其敬聽朕
命朕以不德早承丕緒上靈降禍夙構愆凶妖醜覲
覲密圖社稷宮省之內疑慮驚心公受命先皇志在
匡弼輯諧內外潛運機衡奸人懾憚謀用丕顯俾贊
疏之危為太山之固是公重造皇室作霸之基也伊

我祖考之代寄任已深入掌禁兵外司藩政文經武
略久播朝野戎軒大舉長驅晉魏平陽震熊羆之勢
冀部耀貔虎之威初平東夏人心未一叢臺之北易
水之南西距井陘東至滄海比數千里舉袂如帷委
以連城建旌杖節教因其俗刑用輕典如泥從印猶
草隨風此又公之功也吳越不賓多歷年代淮海之
外時非國有爰整其旅出鎮於亳武以威物文以懷
遠羣盜自奔外戶不閉民黎慕義襁負而歸自北之

風化行南國此又公之功也宣帝御宇任重宗臣入
典八屯外司九伐禁衛勤巡警之務治兵得蒐狩之
禮此又公之功也鑾駕遊幸頻委留臺文武注意軍
國諮稟萬事咸理反顧無憂此又公之功也朕在諒
闇公實總已磐石之宗奸回者衆招引無賴結連羣
小往者國哀甫爾已創陰謀積惡數旬昆吾方稔泣
誅罄旬宗廟以寧此又公之功也尉遲猖狂稱兵鄴
邑欲長戟而指北闕強弩而圍南斗憑陵三魏之間

震驚九州之半聚徒百萬悉成蛇豕淇水洹水一飲
而竭人之死生翻繫凶豎壽之長短不由司命公乃
戒彼鷹揚出車練卒誓蒼兕於河朔建瓴水於東山
口授兵書手畫行陣量敵制勝指日尅期諸將遵其
成旨壯士感其大義輕死忘生轉鬪千里旗鼓奮發
如火燎毛玄黃變漳河之水京觀比爵臺之峻百城
氛祲一旦廓清此又公之功也青土連率跨據東秦
藉負海之饒倚連山之險望三輔而將逐鹿指六國

而願連雞風雨之兵助鬼為虐本根既拔枝葉自殞
屈法申恩示以大信此又功之功也申部殘賊充斥
一隅蠅飛蟻聚攻州略地播以玄澤迷更知反服而
捨之無費遺鏃此又公之功也宇文冑親則宗枝外
藩巖邑影響鄴賊有同就燥迫脅吏民叛渙城戍偏
師誅滅遂入網羅東之虎牢有同囹圄事窮將軍如
伏國刑此又公之功也擅讓席毗擁衆河外陳韓梁
鄭宋衛鄒魯村落成巢獍之墟民庶為豺狼之餌城

有畫閉卷無行人授律出師隨機掃定讓既授首毗
亦泉懸此亦公之功也司馬消難與國親姻作鎮安
陸性多嗜欲意好貪聚擅誅刺舉之使專殺儀台之
臣懼罪畏威動而內異蠶食郡縣鳩毒華夷聞有王
師自投南裔帝唐崇山之罰僅可方此大漢流禦之
刑是亦相匹逋逃入數荆郢周安此亦公之功也王
謙在蜀翻為厲階閉劍閣之門塞靈關之宇自謂五
丁復起萬夫莫向分閭推轂嘗不踰時風馳席卷一

舉大定擒斬兇惡掃地無遺此又公之功也陳頊因循偽業自擅金陵屢遣醜徒趙趙江北公指揮藩鎮無不摧殄方置丈深之柱非止尉佗之拜此又公之功也公有濟天下之勤重之以明德序百揆而穆四門耻一匡之舉九合尊賢崇德尚齒貴功錄舊旌善興亡繼絕寬猛相濟彝倫攸叙敦睦帝親崇獎王室星象不折陰陽自調玄冥祝融如奉太公之召雨師風伯以應成王之宰祥風嘉氣觸石搖林瑞獸異禽

遊園鳴閣至功至德可大可久朕又聞之昔明王設
官胙土營邱四履得征五侯參墟寵章異其祉物故
藩屏作固垂拱責成沉嘿巖廊不下堂席公道高往
烈賞薄前王求諸故實甚用懼焉往加大典憲章在
昔議以自牧未應朝禮日月不居便已隔歲時談物
議其謂朕何今進授相國摠百揆以申州之義陽等
二十郡為隋國今命使持節太傅上柱國杞國公椿
大宗伯大將軍金城公趙熙授相國印授相國禮絕

百辟任摠羣官舊職常典宜與事革昔唐臣太尉舜
佐司空姬旦相周霍光輔漢不居藩國唯在天朝其
以相國摠百揆去衆號馬上所假節大丞相大冢宰
印綬又加九錫其敬聽朕後命以公執律修德慎獄
恤刑為其訓範入無異志是用錫公大輅戎輅各一
玄牡二駟公勤心地利所保人天崇本務農公私殷
阜是用錫公袞冕之服赤舄副馬公樂以移風雅以
變俗遐邇胥悅天地咸和是用錫公軒懸之樂六佾

之舞公仁風德教覃及海隅荒忽幽遐回首內向是
用錫公朱戶以居公水鏡人倫銓衡庶職能官流咏
遺賢必舉是用錫公納陛以登公執釣於內正性率
下犯義無禮罔不屏黜是公錫公虎賁之士三百人

公此段元本闕

是用錫公鈇鉞各一公威嚴夏日精厲秋

霜猶夏必誅顧盼天壤掃清奸宄折衝無外是用錫
公彤弓一彤矢百盧弓十盧矢千惟公孝通神明肅
恭祀典尊嚴如在情切幽明是用錫公秬鬯一卣珪

金史卷之八
續副馬隋國置丞相以下一遵舊式往欽哉其敬循
往策祇服大典簡恤爾庶功對揚我太祖之休命

丙辰天子又詔王冕十有二旒建天子旌旗出警入蹕
乘金根車駕六馬備五時副車置旒頭雲罕樂舞八佾
設鐘簾宮懸王妃為王后世子為太子前後三讓乃受
俄下詔依唐虞漢魏故事王三讓不許乃遣太傅上柱
國祀國公椿奉冊曰咨爾相國隋王粵若上古之初爰
啟清濁降符授聖為天下君非以區宇之富未以宸極

為尊大庭軒轅以前驪連赫胥之日咸以無為無欲不
將不迎遐哉其詳不可聞已厥有載籍遺文可觀聖莫
逾於堯美莫過於舜堯得太尉已作運衡之篇舜遇司
空便叙菁華之竭彼褰裳脫屣二官設饗百官歸禹若
帝之初斯益上則天時下祇天命不敢不受湯伐於夏
武革於殷干戈揖讓雖復異揆應天順人其道不異自
漢迄晉有魏至周天厯逐獄訟之歸神鼎隨謳歌之去
道高者稱帝祿盡者不王與夫文祖神宗無以別也周

德將盡禍難頻興宗戚奸回咸將竊發顧瞻宮闕將圖
宗社藩維連率逆亂相尋搖蕩三方不合如礪蛇行鳥
攫投足無所王受天明命睿德在躬除羣凶於城社廓
妖氛於遠服八極九野萬方四裔圓首方足莫不樂推
往歲長星夜掃經天晝見八風比夏后之作五緯同漢
帝之聚除舊之徵昭然在上近者赤雀降祉玄龜効靈
鐘石變音蛟龍出穴布新之貺煥焉在下朕仰祇皇靈
俯順民願敬以帝位禪於爾躬天祚告窮天祿永終於

戲王其允執厥和儀刑典刑升園邱而敬蒼昊御皇極而撫黔黎副率土之心恢無疆之祚可不盛歟

愚考李德林集以上諸文皆德林筆

遣大宗伯大將軍金城公趙煦奉皇帝璽紱百官勸進王受焉

廣五行記曰周大定時永州得白石割為二段中有楊樹形黃根紫葉

開皇元年春二月甲子王自相府常服入宮備禮卽皇

帝位於臨光殿設壇南郊遣兼太傅上柱國鄧公竇熾
柴燎告天是日告廟大赦改元

音義考曰帝以周齊不遑寧處去隨之足國號大隋
然於音為墮失正音矣

京師慶雲見改周官依漢魏舊制以相國司馬高頴為
尚書左僕射兼納言相國司錄虞慶則為內史監兼吏
部尚書相國內郎李德林為內史令上開府韋世康為
禮部尚書上開府元暉為都官尚書開府戶部尚書元

巖為兵部尚書上儀同司宗長孫毗為工部尚書尚書
上儀同司會揚尚希為度支尚書雍州牧揚會為左衛
大將軍乙丑追尊皇考為武元皇帝廟號太祖

愚按歷代受禪之君皆追封三代隋獨否與桓玄同
皇妣呂氏為元明皇后改周氏左社右廟制為右社左
廟遣八使巡省風俗丙寅脩廟社立王后獨孤氏為皇
后王太子勇為皇太子丁卯以大將軍趙煦為尚書右
僕射上開府伊婁彥恭為右武侯大將軍己巳以五千

戶封周帝介國公為隋室賔周氏諸王皆降為公尋盡
滅其族辛未以皇帝同安郡公奐為雍州牧己亥封皇
弟邵國公慧為滕王同安公奐為衛王皇子鴈門公廣
為晉王俊為秦王秀為越王諒為漢王并州總管李穆
為太師上柱國竇熾為太傅幽州總管子翼為太尉觀
國公田仁恭為太子太師武德郡公柳敏為太子太保
丁丑以晉王廣為并州總管封陳留郡公智積為蔡王
興城郡公靜為道王戊寅改東京府為尚書省發官牛

五千頭分賜貧民

佛藏曰是月命京師及諸州城居聚落各創佛寺

此周武後興佛法之始故謹書之

三月宣仁門槐樹連理衆枝內附壬午白狼國獻方物
甲申太白晝見乙酉又晝見丁亥詔犬馬器玩口味不
得獻上戊子弛山澤禁己丑蓋屋獻連理樹植於宮庭
戊戌以太子少保蘇威兼納言吏部尚書庚子詔前代
品爵悉依舊定丁未梁孝明帝使其太宰蕭岷等來賀

夏四月辛巳大赦壬午太白歲星晝見戊戌太常散樂
並免為編戶禁雜樂百戲辛丑陳人來聘于周至而帝
已受禪致之介國是月發稽胡脩築長城二旬而罷五
月戊午封邦國公楊雄為廣平王永康郡公楊弘為河
間王辛未弒戒公帝舉哀朝堂六月癸未詔以初受命
赤雀降祥推五德相生為火色其郊及社廟依服冕之
儀如朝會之服旗幟犧牲畫尚赤戎服尚黃秋七月乙
卯帝始服黃百寮畢賀

李德林集載詔曰太祖武元皇帝魏氏將謝躬事經
綸周室勃興同心匡贊間關二代造我帝基往者梁
氏將滅親尋構禍蕭譽稱兵擁衆據有襄陽將入魏
朝狐疑未決先帝出師樊鄧飲馬漢兵彼感威懷連
城頓顙隋郡安陸未卽風從敵人騁輔車之援重城
固金湯之守乃復練卒簡徒一舉而尅始於是日遂
啟漢東蕭繹往在江陵主梁稱制外通表奏陰有異
圖王師薄伐帝實先鋒誅厥故命繼其絕祀有齊未

也凶徒孔熾連山巨防艱危萬里晉水之陽是其心
復於是鳴夔秉鉞假道北隣懸兵萬里直指參墟左
紫右拂麻積草靡雖事未既也而英風大震齊人因
以挫衄周武賴以成功積德累仁福流後嗣俾朕虛
薄君臨區有昔夏因治水尚且銘山周日巡遊猶因
勒石其襄陽隋郡江陵晉陽並宜立寺一所建碑頌
德

八月壬午廢東京官甲午遣樂安公元諧擊吐谷渾於

青海破降之九月戊申遣使賑給戰亡者家庚午陳將
周羅暉攻臨朝墅蕭摩訶冠江北卒未以越王秀為益
州總管改封蜀王壬申以薛公長孫覽宋安公元景山
並為行軍元帥伐陳仍令尚書左僕射高頴節度諸軍
是月行五銖錢冬十月乙酉百濟王扶餘昌遣使來賀
授昌上開府儀同三司帶方郡公戊子行新律壬辰行
幸岐州十一月乙卯以永富郡公竇榮定為右武侯大
將軍遺兼散騎侍郎鄭撫使於陳己巳有流星如墜墻

光照於地十二月甲申以禮部尚書韋世康為吏部尚書庚子至自岐州壬寅高麗王高陽遣使朝貢授陽大將軍遼東郡公太子太保柳敏卒是歲鞞鞞突厥阿波可汗沙鉢略可汗並遣使朝貢

二年春正月癸丑幸上柱國王誼第庚申幸安成長公主第庚申陳孝宣帝殂幸西置河北道行臺尚書省於并州以晉王廣為尚書令置河南道行臺尚書省於洛州以秦王俊為尚書令置西南道行臺尚書省於益州

以蜀王秀為尚書令戊辰陳遣使請和求歸胡墅甲戌
詔舉賢良二月己丑詔以陳有喪命高頴等班師庚寅
加晉王廣左武衛大將軍辛卯幸趙國公獨孤陀第庚
子京師雨土三月初命入宮殿門通籍戊申開渠引杜
陽水於三時原夏四月丁丑以寧州刺史竇榮定為左
武侯大將軍庚寅大將軍韓僧壽破突厥於雞頭山上
柱國李充破突厥於河北山五月戊申以上開府長孫
平為度支尚書己酉以旱故帝親省囚徒其日大雨已

未高寶寧寇平州突厥入長城庚申以豫州刺史皇甫
績為都官尚書甲子改傳國璽曰受命璽丁卯詔民年
六十以上免課六月壬午以太府卿蘓孝慈為兵部尚
書甲申使使弔於陳乙酉上柱國李充破突厥於馬邑
丙申詔曰朕祇奉上玄君臨萬國屬生靈之弊處前代
之官以為作之者勞居之者逸改創之事心未遑也而
王公大臣陳謨獻策咸云義農以降至於姬劉有當世
而屢遷無革命而不徒曹馬之後時見因循乃末世宴

安非往聖宏義此城從漢彫殘日久屢為戰場舊經喪
亂今之宮室近代權宜又非謀筮從龜瞻星揆日不足
建皇王之邑合大衆所聚論變通之數具幽顯之情同
心因請詞情深切然則京師百官之府四海歸向非朕
一人所獨有苟利於物其可違乎且殷之五遷恐人盡
死是則吉凶之土制長短之命謀新去故如農望秋雖
則劬勞究安宅今區宇寧一陰陽順序安安以遷勿懷
胥怨龍首山川原秀麗卉物滋阜卜食相土宜建都邑

定鼎之基永固無窮之業在斯公私府宅規模遠近營
構資須隨事條奏仍詔左僕射高頴將作大匠劉龍鉅
鹿郡公賀婁子幹太府少卿高龍又等創造新都秋七
月癸巳詔新置都處墳墓令悉遷葬設祭仍給人功無
主者命官為殯葬甲午行新令冬十月以撮毀故徙居
東宮給內外官人祿癸酉皇太子勇屯兵咸陽以備胡
虜庚寅帝疾愈享百寮於觀德殿賜錢帛皆任自取盡
力以出辛卯以營新都副監賀婁子幹為工部尚書十

一月丙午初命為方陣戰法及制軍營圖樣下諸軍府
擬征突厥十二月辛未帝講武後園甲戌上柱國竇毅
卒丙子名新都曰大興城乙酉遣彭城公虞慶則屯弘
化以備胡突厥寇周槃行軍總管達奚長儒為虜所敗
丙戌賜國子生經明者束帛丁亥親錄囚徒是歲高麗
百濟並遣使朝貢

三年春正月庚子將遷新都大赦禁大刀長稍始令人
以二十一戌丁歲役功不過二十日不役者收庸廢遠

近酒坊罷鹽井禁

冊府元龜隋書食貨志曰是月詔罷酒坊又以周末
專利鹽池鹽井皆禁詔與百姓共之矯前僣也又詔
朔州總管趙仲卿大興屯田於長城北以實塞下又
詔河西勒民立堡營田積穀京師置常平監

二月己巳朔日有蝕之癸酉陳人來聘突厥犯邊癸未
以左武衛大將軍李禮成為右武衛大將軍三月丁未
上柱國鮮虞縣公謝慶恩卒丙辰以雨故常服入新都

京師承明里醴泉出丁巳詔購遺書於天下癸亥城榆
關夏四月己巳衛王爽大破突厥於白道山停築原陽
雲內紫河等鎮而還上柱國建平郡公于義卒庚午吐
谷渾寇臨洮洮州刺史皮子信死之壬申以尚書右僕
射趙煦兼內史今丁丑以滕王瓚為雍州牧庚辰行軍
總管陰壽大破高寶寧於黃龍甲申以早故帝親祀雨
師丙戌詔天下勸學行禮

冊府元龜詔曰魏氏不競周齊抗衡遽為強弱多厯

年所務權詐而薄儒雅重干戈而輕俎豆朝野以機巧為師文吏刻深為法雖復建立庠序業非時貴道亦不行然維持名教微相弘益治國立身非禮不可而積習生常閭閻吉凶之禮動悉乖方執憲之職率爾無聞古今之學且耕且養若敦以學業勸以經術自可家慕大道人希至德始自京師爰及州郡宜祇朕意勸學行禮

己丑陳郢州城主張子譏遣使請降帝以和好不納辛

卯遣兼散騎常侍薛舒聘於陳癸巳帝親雩五月癸卯
太尉任城公于翼卒行軍總管李晃破突厥於摩那渡
口乙巳梁太子蕭琮來賀遷都辛酉親祀方澤壬戌行
軍元帥竇滌定破突厥及吐谷渾於涼州赦黃龍死罪
以下六月庚午封衛王爽子集為遂安郡王戊寅突厥
遣使求和庚辰行軍總管梁遠破吐谷渾於爾汗山斬
其名王秋七月壬戌詔曰往者山東河表經此長亂孤
城遠守多不自全濟陰太守杜猷身臨賊徒命懸寇手

郡省事范臺致傾產營護免其戮辱眷言誠節寔有可
嘉宜超恒賞用明沮勸臺致可大都督假湘州刺史丁
卯日有蝕之八月壬午遣尚書右僕射高頴出寧州道
吏部尚書虞慶則出原州道並為行軍元帥以擊胡戊
子親祀太社九月壬子幸城東觀稼癸丑大赦冬十月
甲戌廢河南道行臺省十一月發使巡省風俗又詔使
者舉賢才以備銓擢庚辰陳人來聘陳主知帝貌異世
人使副使袁彥圖像而去甲午罷天下諸郡十二月乙

邠遣兼散騎常侍唐令則使於陳戊午以刑部尚書蘇
威為戶部尚書是歲高麗突厥靺鞨並遣使朝貢

是歲陳後主至德元年

四年春正月甲子朔日有蝕之祀太廟辛未祀南郊壬
申梁孝明帝來朝甲戌大射於北苑十日罷壬午齊州
水辛邠渝州獲獸似麋一角同蹄壬辰班新厯二月乙
巳帝餞梁帝於霸上庚戌行幸隴州突厥可汗阿史那
玷厥率其屬來降夏四月己亥勅總管刺史父母及子

年十五以上不得將之官庚子以吏部尚書虞慶則為
尚書右僕射瀛洲刺史揚尚希為兵部尚書毛州刺史
劉仁恩為刑部尚書五月癸酉契丹主莫賀弗遣使請
降拜大將軍六月庚子降囚徒壬子開通濟渠自渭達
河以通運漕

隋書食貨志載詔曰京邑所居五方輻湊重關四塞
水陸艱難大河之流波瀾東注百川海濟萬里交通
雖三門之外或有危慮但發自小平陸運至陝還從

河水入於渭川兼及上流控引汾晉舟車來去為益
殊廣而渭川水力大小無常流沙淺深卽成阻闕計
其途路數百而已動移氣序不能往復汎舟之役人
亦勞止公私之弊情實愍之故東發潼關西引渭水
因籍民力開通漕渠量事計功易可成就不有暫勞
安能久逸宣告民庶知朕意焉

甲寅制官人非戰功不授上柱國以下戎官以雍同華
岐宜五州旱命無出今年租調戊午秦王俊來朝秋七

月丙寅陳人來聘八月甲午遣十使巡省境內戊戌衛
王爽來朝壬寅上柱國太傅鄧公實熾卒乙卯陳將夏
侯苗請降帝以通和不納九月甲子幸襄國公主第乙
丑幸灞水觀漕渠賜督役者帛己巳帝親錄囚徒庚午
契丹內附甲戌以關中飢行幸洛陽癸未太白晝見冬
十一月壬戌遣兼散騎常侍薛道衡使於陳甲戌改周
十二月為臘

冊府元龜載詔曰古稱臘者接也取新故交接姬周

歲首今仲冬建亥之月稱蜡可也後周用夏后之時
行姬氏之蜡考諸先代於義有違其十一月行蜡者
停可以十二月為臘

是歲鞞鞞女國並遣使朝貢

五年春正月戊辰詔行新禮壬申詔罷江陵總管後至
梁主琮時依舊三月戊午以尚書左僕射高穎為左領
軍大將軍以上柱國宇文忻為右領軍大將軍夏四月
壬寅上柱國王頡謀反誅乙卯詔徵山東大儒馬崇伯

等戊申車駕至自洛陽五月甲申初置義倉梁孝明帝
殂遣上大將軍元契使於突厥阿陂可汗秋七月庚申
陳人來聘壬午突厥沙鉢略可汗上表稱臣八月甲辰
河南諸州水遣戶部尚書蘇威賑給之戊申有流星數
百四散而下己酉幸栗園九月丁巳至自栗園九月乙
丑改鮑陂曰杜陂灞水曰滋水丙子遣兼散騎常侍李
若使於陳冬十一月丁卯晉王廣來朝十二月丁未降
囚徒是歲契丹遣使朝貢

六年春正月甲子黨項羌內附庚子班厯於突厥壬申
使戶部尚書蘇威巡省山東二月乙酉山南荆浙七州
水達前工部尚書長孫毗賑卹之丙戌制刺史上佐每
歲暮更入朝上考課丁亥發丁男十一萬修築長城二
旬罷庚子大赦三月己未洛陽男子高德上書請帝為
太上皇傳位皇太子帝曰朕承天命撫育蒼生日旰
夜猶恐不逮豈學近代帝王事不師古傳位於子自求
逸樂哉癸亥突厥沙鉢略可汗遣使朝貢夏四月己亥

陳人來聘秋七月辛亥河南諸州水乙丑京師雨毛如
馬尾長者二尺餘短者六七寸八月辛卯關內七州旱
蠲其賦稅遣散騎常侍裴世豪使於陳戊申上柱國太
師申公李穆卒閏月丁卯皇太子鎮洛陽辛未晉王廣
秦王俊並來朝丙子上柱國郟國公梁士彥上柱國杞
公宇文忻柱國舒公劉昉謀反伏誅上柱國許公宇文
善有罪除名九月辛巳帝素服御射殿詔百寮射梁士
彥三家資物丙戌上柱國宋安公元景山卒辛丑詔賑

恤大象以來死事之家

隋書刑罰志曰是年詔免尉遲迴王謙司馬消難三
逆人家口配沒者悉官酬贖使為編戶因除孛戮相

坐法

冬十月己酉以河北道行臺尚書令并州總管晉王廣
為雍州牧餘官如故以兵部尚書楊尚希為禮部尚書
癸丑置山南道行臺尚書省於襄州以秦王俊為尚書

令

隋書五行志曰是年霍州有老翁化為虎 梁後主

琮廣運元年

七年春正月癸巳祀太廟乙未制諸州歲貢三人二月
丁巳祀朝日於東郊巳巳陳人來聘壬申幸醴泉宮是
月發丁男十萬修築長城二旬罷夏四月巳酉幸晉王
弟庚戌於揚州開山陽瀆以通運漕突厥沙鉢略可汗
卒癸亥頒青龍符於東方總管刺史西方以西方以白
虎南方以朱雀北方以玄武甲戌遣兼散騎常侍楊周

使于陳以戶部尚書蘓威為吏部尚書五月乙亥朔日
有蝕之巳卯隕石於武安滏陽間十餘里秋七月己丑
衛王奕薨帝發喪於門下外省八月庚申梁後主蕭琮
來朝九月乙酉梁安平王蕭岷掠於其國以奔陳辛卯
廢梁國曲赦江陵以梁主蕭琮為柱國封甘國公冬十
月庚申行幸同州以先帝所居曲降囚徒癸亥幸蒲州
丙寅宴父老帝極歡曰此間人物衣服鮮麗容止閑雅
良由士官之鄉陶染成俗也十一月甲午幸馮翊祭故

社父老對詔失旨帝大怒免其縣官而去戊戌車駕至
自馮翊

隋書五行志曰是年相州有桑門化為蛇尾繞樹而
自抽長二丈許陳禎明元年

八年春正月乙亥陳人來聘二月辛酉陳人寇破州三
月辛未上柱國隴西公李詢卒甲戌遣兼散騎常侍程
尚賢使於陳戊寅詔大舉伐陳

隋書載詔曰有陳竊據江表逆天暴物朕初受命陳

項尚存往來修睦望其遷善時日無幾釁惡已聞厚
納叛亡侵犯城戍于時王師大舉將一車書陳項反
地收兵責躬請約俄而致殞仍詔班師叔寶承風因
求繼好每見珪璫入朝輜軒出使何嘗不殷勤曉諭
戒以惟新而狼子之心出而彌野威侮五行怠棄三
正誅剪骨肉夷滅才良據手掌之地恣溪壑之險劫
奪閭閻資產俱竭驅蹙內外勞役弗已徵責女子擅
造宮室日增月益止足無期帷簿墳牆有逾萬數實

衣王食窮奢極侈淫聲樂飲俾晝作夜斬直言之客
滅無罪之家欺天造惡祭鬼求恩歌舞衢路酣醉宮
闈盛粉黛而執干戈曳綺羅而呼警蹕躍馬振策從
旦至昏負甲持戈隨逐徒行天災地孽物怪人妖衣
冠鉗口道路以目自古昏亂罕或能比傾心翹足誓
告於我重以背德違言搖蕩疆場已映之下海滋以
西江北江南為鬼為魃抄掠人畜斷截樵蕪市井不
立農事廢寢厯陽廣陵窺覩相繼或謀圖城邑劫剽

吏民晝伏夜遊鼠竄狗盜彼則羸兵倣卒來必就擒
此則重門設險有勞蕃捍天之所覆無非朕臣每闕
聽覽有懷傷惻有梁之國我南藩也其君入朝潛相
招誘不顧朕恩士女深迫脅之悲城府致空虛之歎
豈容對而不誅忍而不救近日秋始謀欲弔民益部
樓船盡令東騫便有神龍數十騰躍江流引伐罪之
師向金陵之路船作則龍止船行則龍去四日之內
三軍皆覩豈非蒼昊愛人幽明展事降神先路協贊

軍威便可出師授律永清吳越其將士糧仗水陸資
須期會進止一准別勅

隋書五行志曰是年四月幽州民家以白楊木懸灶
上積十餘年忽生三條皆長三尺餘甚鮮茂

秋八月丁未河北諸州饑遣吏部尚書蘇威賑恤之九
月癸巳嘉州言龍見冬十月巳亥太白出西方巳未置
淮南行臺省於壽春以晉王廣為尚書令辛酉陳人來
聘拘不遣甲子有星孛於牽牛將伐陳有事太廟授律

令晉王廣秦王俊清河公楊素並為行軍元帥伐陳於
是晉王出六合秦王出襄陽素出信州荊州刺史劉仁
恩出江陵宜陽公王世積出蕪春新義公麟擒虎出廬
江襄邑公賀若弼出吳州落叢公燕榮出東海合摠管
九十兵五十一萬八十皆受晉王節度東接滄海西距
巴蜀旌旃舟楫橫亘數千里

明楊慎集載帝詔曰陳國未盡藩節誠須責罪若命
水龍終當屈水龍謂戰船也

仍由赦陳國十一月丁卯車駕餞師詔購陳叔寶位上
柱國萬戶公乙亥行幸定城陳師誓衆丙子幸河東十
二月車駕至自河東

九年春正月己巳白虹夾日癸酉以尚書左僕射虞慶
則為右衛大將軍丙子賀若弼敗陳師於蔣山獲其將
蕭摩訶韓擒虎進師入建鄴獲陳主叔寶陳國平合州
四十郡一百縣四百戶五十萬口二百萬癸巳遣使持
節巡撫之二月乙未廢淮南尚書省丙申制五百家為

鄉正一人百家為里長一人夏四月己亥幸驪山親勞
旋師乙巳三軍凱入獻俘太廟以晉王廣為太尉庚戌
帝御廣陽門宴將士頒賜各有差辛亥大赦以陳都官
尚書孔範散騎常侍王瑳王儀御史中丞沈觀等邪佞
以致滅亡皆投之邊裔陳人普給復十年軍人畢世免
徭役擢陳文武衆才而用之宮奴數千可歸者歸之餘
盡分賜將士及王公貴臣其資物皆於五琛賜王公以
下大射毀所得秦漢三大鐘越二大鼓又設亡陳女樂

謂公卿等曰此聲似啼朕聞甚不喜故與公等一聽也
國之音俱為永鑒辛酉以吏部侍郎宇文弼為刑部尚
書宗政卿楊昇為工部尚書壬戌詔曰今率土大同含
生遂性兵可立威不可不戢刑可措化不可專行禁衛
九重之餘鎮守四方之外戎旅軍器皆宜停罷武力之
子俱可學文民間甲仗悉皆除毀閏月丁丑頒木魚符
於總管刺史雌一雄三巳卯以吏部尚書蘇威為尚書
右僕射六月乙丑以荊州總管楊素為納言丁卯以吏

部侍郎盧愷為禮部尚書時羣臣咸請封禪詔不許曰
豈可命一將軍除一小國以薄德封名山用虛言干上
帝邪八月壬戌以廣平王雒為司空冬十一月壬辰考
使定州刺史豆盧通等上表請封禪亦不許庚子以右
衛大將軍虞慶則為右武衛大將軍右領軍將軍李安
為右領軍大將軍甲寅降囚徒十二月甲子詔太常卿
牛弘通直散騎常侍許善心秘書丞姚察通直郎虞世
基等議定樂

隋書載詔曰朕清蕩萬方情存古樂鄭衛淫聲魚龍
雜戲樂府之內盡以除之今欲更調律呂改張琴瑟
且妙術精微非因教習工人代掌止傳糟粕不足達
神明之德論天地之和區域之間奇才異議天知神
授何代無之蓋晦迹於非時俟昌言於所好宜可搜
訪速以奏聞庶覩一藝之能共就九成之業

冊府元龜載是年詔曰朕君臨區宇於斯九載開直
言之路披不諱之心自頃逞議論功昌言乃衆推誠

切諫其事甚踈公卿士庶非所望也各啟至誠輔茲
不逮無或默默退有後言

十年春正月乙未以皇孫昭為河南王楷為華陽王二
月庚申行幸并州

隋書五行志曰帝幸并州宴秦王及王子相帝為四
言詩曰紅顏詎幾玉貌須臾一朝花落白髮難除明
年後歲誰有誰無明年子相卒十八年王薨

夏四月辛酉車駕還宮五月乙未詔曰魏末喪亂縣宇

瓜分役軍歲動未遑休息兵士軍人權置坊府南征北
伐居處無定家無完堵地罕苞桑恒為流寓之人竟無
鄉里之號朕甚憇之凡是軍人可悉屬州縣墾田籍帳
一同編戶軍府統領宜依舊式罷山東河南及北方緣
邊之地新置軍府六月辛酉制民年五十免役收庸秋
七月癸卯以納言楊素為內史令庚戌帝親錄囚徒辛
亥高麗遼東郡公高陽卒八月壬申遣柱國韋洸上開
府王景並持節巡撫嶺南百越皆服九月丁酉至自并

州冬十月甲子頒木魚符於京官五品以上十一月辛卯幸國學頒賜各有差辛丑祀南郊是月婺州人汪文進會稽人高智慧蕪州人沈玄愴皆舉兵反自稱天子樂安蔡道人饒州吳世華永嘉沈孝徽泉州王國慶餘杭楊寶英交趾季春等皆自稱大都督詔內史令楊素討平之是歲吐谷渾契丹並遣使朝貢

十一年春正月丁酉以平陳所得古器多為妖變悉毀之丙午皇太子妃元氏薨帝舉哀東宮文思殿二月戊

午以大將軍蘓孝慈為工部尚書丙子以臨潁令劉曠
政績尤異擢莒州刺史辛巳晦日有蝕之夏五月癸卯
詔百官悉詣朝堂上封事乙巳以右衛將軍元昊為左
衛大將軍秋八月壬申幸栗園滕王瓚薨巳亥至自栗
園上柱國沛國公鄭譯卒是歲突厥高麗靺鞨並遣使
朝貢突厥獻七寶盤

十二年春二月巳巳以蜀王秀為內史令兼右領軍大
將軍以漢王諒為雍州牧右衛大將軍秋七月乙巳尚

書右僕射邳公蘇威禮部尚書容城侯盧愷並坐事除
名壬申幸昆明池卽日還宮己巳享太廟晦日有蝕之
八月甲戌制天下死罪諸州不得便決皆令大理覆之
乙亥幸龍首池癸巳制宿衛者不得輒離所守丁酉上
柱國楚公豆盧勣卒戊戌帝親錄囚徒冬十月丁丑以
遂安王集為衛王壬午祀太廟至太祖神主前帝流涕
嗚咽不自勝十一月辛亥祀南郊己未上柱國新義公
韓擒虎卒甲子百寮大射於武德殿十二月乙酉以內

史令楊素為尚書右僕射是歲突厥吐谷渾靺鞨並遣使朝貢

十三年春正月乙巳上柱國郇公韓建業卒壬子祀感帝已未以信州總管韋世康為吏部尚書壬戌行幸岐州二月丙子詔營仁壽宮丁亥至自岐州己卯立皇孫暕為豫章王戊子晉州刺史南陽郡公賈悉達隰州總管撫寧郡公韓延等以賄伏誅己丑制坐事去官者配防一年丁酉制私家不得隱藏緯候圖讖夏五月癸亥

詔禁民間撰集國史臧否人物秋七月丁巳幸昆明池
戊辰晦日有蝕之九月丙辰降囚徒庚申封邵公楊綸
為滕王冬十一月乙卯上柱國華陰公梁彥光卒是歲
契丹奚霫室韋靺鞨並遣使朝貢

十四年夏四月乙丑詔曰比命有司總令研究正樂雅
聲詳定已訖宜卽施用見行者停民間音樂流僻日久
棄其舊體競造繁聲流宕不歸遂以成俗宜加禁約務
存其本五月辛酉京師地震關內諸州旱六月丁卯詔

省府州縣皆給廨田不得治生與民爭利秋七月乙未以邳公蘓威為納言八月辛未關中大旱民饑帝率戶口就食洛陽并命民山東就食冬閏十月甲寅詔曰梁齊陳往皆創業一方綿歷年代卽宗祀廢絕祭奠無主興言矜念良以愴然昔國公蕭琮及高仁英陳叔寶等宜令以時世修祭祀所須器物有司給之

時帝已先封周族人洛為介國公尹起莘謂獨不及周誤乙卯制外官九品以上父母及子年十五不得從

之官十一月壬戌制州縣佐史三年一代不得重任癸
未有星亭於角亢十二月乙未東巡狩

佛藏曰是歲也勅自十年四月以前諸有僧尼私度
者並給額附責任其出家凡增數十萬人

十五年春正月壬戌車駕次齊州親問疾苦丙寅旅王
符山庚午以歲旱祀泰山謝咎大赦天下二月丙辰禁
私家畜兵器關中緣邊不在其例禁河以東不得乘馬
丁巳上柱國蔣公梁睿卒三月己未車駕至自東巡望

祭五嶽海瀆丁亥幸仁壽宮夏四月己丑朔大赦甲辰
以趙州刺史楊達為工部尚書五月丁亥制京官五品
以上佩銅魚符六月戊子詔鑿砥柱庚寅相州刺史豆
盧通貢綾文布命焚於朝堂辛丑詔名山未祀典者
悉命祀之秋七月甲戌遣郅公蕤威巡省江南戊寅至
自仁壽宮辛巳制九品以上官以理去官者並聽執笏
冬十一月辛酉幸溫湯乙丑至自溫湯十二月戊子敕
盜邊糧一升以上皆斬籍沒其家己丑詔文武官以四

考更代是歲吐谷渾林邑等國並遣使朝貢

十六年春二月丁亥封皇孫裕為平原王筠為安成王
窺為安平王恪為襄城王該為高陽王韶為建安王煦
為潁川王夏六月甲午制工商不得進任并州大蝗辛
丑詔九品以上妻五品以上妻夫亡不得改嫁秋八月
庚戌詔決死罪者三奏方行刑冬十月己丑幸長春宮
十一月壬子至自長春宮

十七年春二月癸未太平公史萬歲伐西寧克之庚寅行幸

仁壽宮庚子上柱國王世積討桂州賊李光任平之三月丙辰
詔諸司屬官有犯聽于律令外斟酌決杖辛酉帝親錄囚
徒癸亥上柱國彭城公劉昶以罪伏誅庚午遣御史柳或皇
甫誕巡河南北夏四月戊寅頒新曆壬午詔功臣世子世孫
未經州任者量才叙用五月庚申晏百寮於玉女泉班
賜各有差己巳蜀王秀來朝閏月己卯郡鹿入殿門馴
擾侍衛內秋七月丁丑桂州人李世賢反遣右武侯大
將軍虞慶則討平之丁亥并州總管秦王俊坐事免以

王就第九月甲申車駕至自仁壽宮庚寅帝謂侍臣曰
廟庭設樂本以迎神齋祭之日觸目多感當此之際何
可為心在路奏樂禮為未允公卿宜更詳之冬十月丁
未頒銅虎符於驃騎車騎府戊申道王靜薨庚午詔曰
五帝異樂三王殊禮皆隨事有損益因情立節文仰惟
祭享宗廟瞻敬如在罔極之感情深茲日而禮畢升路
鼓吹發音還入宮門金石振響斯則哀樂同日心事相
違宜改茲往式用弘禮教自今享廟日不須備鼓吹殿

庭勿設樂懸辛未京師大索十二月壬子上柱國桂州
道行軍總管魯公虞慶則以罪伏誅

隋書五行志曰大興城西南袁村設佛會有一老翁
白裙襦衣求食而去衆莫識追觀之行二里許不見
但一陂中白魚長丈餘小魚從者無數人爭射之或
弓折弦斷竟中之剖其腹得杭飯始知此魚向老翁
也後數日漕渠水暴溢人皆溺死

是歲高麗突厥並遣使朝貢

十八年春正月辛丑詔曰是越之民往承弊俗所在之處私造大船因相聚結致有侵害江南諸州民間有船長三丈以上悉括入官二月甲辰幸仁壽宮乙巳以漢王諒為行軍元帥水陸三十萬伐高麗夏五月辛亥詔畜猫鬼蠱毒厭魅野道之家投于四裔六月丙寅詔黜高麗王高元官爵秋八月丙子詔京官五品以上總管刺史舉志行脩謹清平幹濟之士九月己丑漢王諒師遇疾疫而旋死者十二三庚寅敕舍客無公驗者坐及

刺史縣令辛卯車駕至自仁壽宮冬十一月甲戌帝親錄囚徒癸未祀南郊十二月庚子上柱國夏州總管東萊公王景以罪伏誅是歲自京師至仁壽宮置行宮十所祀宋陳亳曹戴頴等州水詔並免庸調

十九年春正月癸酉大赦戊寅大射於武德殿二月己亥晉王廣來朝甲寅幸仁壽宮夏四月丁酉突厥利可汗內附達頭可汗犯塞行軍總管史萬歲擊破之六月丁酉以豫章王暕為內史令秋八月癸卯上柱國尚書

左僕射齊公高頴坐事免辛亥上柱國皖城公張威卒
甲寅上柱國城陽公李徹卒九月乙丑以太常卿牛弘
為吏部尚書冬十月甲午以突厥利可汗為啟民可汗
築大利城處其部落十一月有司言元年己未日漸長
十二月乙未突厥都藍可汗為部下所殺國大亂星隕
於勃海

二十年春正月辛酉朔帝幸仁壽宮突厥高麗契丹並
遣使朝貢二月丁丑無雲而雷三月辛卯熙州入李英

林反遣行軍總管張衡討之夏四月壬戌突厥犯塞以
晉王廣為行軍元帥擊破之乙亥天有聲如瀉水自南
而北六月丁丑秦王俊薨九月丁未車駕還宮冬十月
己未太白晝見乙丑廢皇太子勇及諸子為庶人

隋書太子勇傳載詔曰太子之位實為國本自古儲
副長惡不悛仍令守器皆由情溺寵愛致使宗社傾
亡蒼生塗地由此言之天下安危繫乎上嗣豈不重
哉皇太子勇地則居長情所鍾愛初登大位卽建春

宮而性識庸闇仁孝無聞昵近小人委任奸佞前後
愆釁難以具舉豈敢以不肖子亂天下勇及其男女
為王公主者並可廢為庶人事非獲已良深愧嘆

殺柱國太平公史萬歲己巳殺左衛大將軍五原公元
吳十一月戊子立晉王廣為皇太子天下地震京城大
風雪十二月戊午詔東宮官屬於皇太子不得稱臣辛
巳詔毀壞偷盜佛及天尊象獄鎮海瀆神形者以不道
論沙門壞佛像道士壞天尊像以惡逆論

仁壽元年春正月乙酉朔大赦改元以尚書右僕射楊
素為左僕射以納言蘇威為右僕射丁酉徙河南王昭
為晉王突厥寇恒安遣柱國韓洪擊之敗績以晉王昭
為內史令辛丑詔曰君子立身雖云百行惟誠與孝最
為其首故投生殉節自古稱難殞身王事禮加二等而
世俗之徒不達大義致命戎旅不入兆域興言念此每
深愍歎且入廟祭祀並不廢闕何止墳塋獨在其外自
今戰王之徒宜入墓域二月乙卯朔日有蝕之夏五月

己丑突厥男女九萬餘口來降壬辰驟雨震雷大風拔木宜君湫水移於始平六月乙卯遣十六使巡省風俗已丑廢太學及州縣學唯留國子一學取正三品以上子七十二人充生

隋書載詔曰儒學之道訓教生人朕撫臨天下思弘德教延集學徒崇建庠序開進仕之路佇賢雋之人而國學胄子垂將千數州縣諸生成亦不少徒有名錄空度歲時未有德為代範才任國用良由設學之

理多而未精今宜簡省明加獎厲於是國子學唯留
學生七十人太學四門及州縣學並廢

頒舍利於諸州秋七月戊戌改國子為太學

隋書五行志載是年十月蘭州楊樹上松生高三尺
六節十二枝

十一月己丑祀南郊十二月楊素擊突大破之

二年春三月己亥帝幸仁壽宮夏四月庚戌岐雍二州
地震秋七月丙戌詔內外官各舉所知八月己巳皇后

獨孤氏崩九月丙戌車駕還宮壬辰河南北諸州大水
遣工部尚書楊達賑恤之乙未上柱國袁州總管金水
公周搖卒隴西地震冬十月壬子曲赦益州管内癸丑
以工部尚書楊達為納言閏月甲申詔尚書左僕射楊
素與諸術者刊定陰陽并謬己丑詔楊素右僕射蘇威
吏部尚書牛弘內史侍郎薛道衡祕書丞許善心內史
舍人虞世基著作郎王劭等脩定五禮

隋書載詔曰禮之為用時義大矣黃琮蒼璧降天地

之神藥盛牲食展宗廟之敬正父子君臣之序明婚
姻喪紀之節故道德仁義非禮不成安上治民莫善
於禮自區宇亂離歷年代王道衰而變風作微言絕
而大義乖與代推移其弊日甚至於四時郊祀之節
文五服麻葛之隆殺是非異說躋駁殊塗致使聖教
凋訛輕重無准朕當澆滌之時屬干戈之代刪正彝
典日不暇給今四海乂安五戎勿用理宜弘風訓俗
道德齊禮綴往聖舊章興先王茂則尚書左僕射越

國公楊素尚書右僕射邳國公蕪威吏部尚書奇章
公牛弘內史侍郎薛道衡祕書丞許善心內史舍人
虞世基著作郎王劼或任居端揆博達古今或器推
令望學綜經史委以裁緝實允僉議可並脩定五禮
壬寅莫獻皇后於太陵于二月癸巳益州總管蜀王秀
有罪廢為庶人交州人李佛子舉兵反遣行軍總管劉
方討平之三年春二月戊子以大將軍蔡陽郡公姚辨
為左武侯大將軍夏五月癸卯詔曰哀哀父母生我劬

勞但風樹不敬嚴敬莫追霜露既降感思徒切六月十
三日是朕生日其日令海內為武元皇帝元明皇后斷
屠六月甲午詔曰禮云親以期斷蓋以四時之變易萬
物之更始故聖人象之其有三年加隆爾也但家無二
尊母為厭降是以父在喪母還服於期者服之正也豈
容期內而更小祥然三年之喪而有小祥者禮云期祭
禮也期而除喪道也以是之故雖未再期而天地一變
不可不祭不可不除故有練焉以存喪祭之本然期喪

有練於理未安雖云十一月而練乃無所法象非期非時豈可除察而儒者徒擬三年之喪立練禫之節可謂苟存其變而失其本欲漸於奪但薄於喪致使子則冠練去經黃裏纈緣經則布葛在躬粗服未改豈非經哀尚存子情已奪親踈失倫輕重顛倒乃不順人情豈聖人之意故知先聖之禮廢于人邪三年之喪尚有不行者至於祥練之節安能不墜禮云父母之喪無貴賤一也而大夫士之喪父母乃貴賤異服然則禮壞樂崩由

來漸矣所以晏平仲斬粗線其老謂之非禮滕文公服三年其臣咸所不欲蓋由王道既衰諸侯異政將踰越法度惡禮制害已乃減去篇籍自制其宜遂至骨肉之恩輕重從俗無易之道隆殺任情夫禮不從天降不從地出由人而已謂情緣於恩也故恩厚者禮隆情輕者禮薄聖人以是稱情立文別親疎貴賤之節自臣子道消上下失叙莫大之恩逐情而薄莫重之化與時而殺此乃服不稱喪容不稱服非聖人緣恩表情制禮之時

然喪與其易也寧戚則禮之本也禮有其餘未若於哀則情之實也今十一月而練非禮之本非情之實由是言之父在喪母不宜有練但依禮十三月而祥中月而禫庶合聖人之意達人子之心秋七月丁卯詔州縣搜揚賢哲咸取明知古今通識安危究政教之本達禮樂之源不限多少不得不舉徵召將送必須以禮

隋書載詔曰日往月來唯天所以運序山鎮川流唯地所以宣氣故能成天地大德育萬物為功况一人

君四海獨見致治不藉羣才未之有也是以唐堯欽
明命羲和居嶽虞舜睿德升元凱作相此則鳴鶴在
陰其子必和風雲之從龍虎賢哲之應聖明君德不
回臣道以正故能通天地之和順陰陽之序自王道
衰民風薄上莫能公道以御物下必踵私法以希時
上下相蒙君臣義失則政乖政乖則人困蓋同德之
風難嗣離德之軌易追則任者不休休者不任是以
行歌避代辭位灌園卷而可懷黜而勿愠放逐江湖

之上沉赴河海之流至於閭巷秀異之士鄉曲博雅
之儒言足佐時行足勵俗遺棄於草野湮滅而無聞
所以覽古而歎息也方今區宇一家實乃天意朕夙
夜祇懼日慎一日兆庶未康一物失所雖求傳嶷莫
見幽人徒相崆峒未聞至道唯恐商歌長夜抱關夷
門遠跡天羊之間屈身僮僕之伍其令州縣搜訪賢
哲皆取明知古今通識治亂究政教之本達禮樂之
源不限多少不得不舉限以三旬咸令進路徵召將

送必須以禮

八月壬申上柱國檢校幽州總管落藁公燕榮以罪伏
誅九月壬戌置常平倉甲子以營州總管韋冲為戶部
尚書十二月癸酉河南諸州水遺納言楊達賑恤之

四年春正月丙辰大赦甲子幸仁壽宮夏四月乙卯帝
不豫六月庚午大赦有星入月中數日而退長人見鴈
門秋七月乙未日青無光八日乃復甲辰帝疾甚卧於
仁壽宮與百寮辭訣握手歔歔丁未太子廣弒帝崩於

大寶殿

趙毅大業略記曰煬帝聞高祖欲召太子勇呼楊素
張衡進毒藥又簡驍健官奴三十人皆服婦人衣
下置仗立於門巷間為衛素等既入高祖暴崩馬總
通歷曰張衡入拉高祖血濺御屏寃痛之聲聞外兩
說未知孰是

時年六十四詔曰嗟乎自晉室播遷天下分裂以至周
齊戰爭相尋上天降監授命於朕揆亂反正天下大同

所以昧旦臨朝不敢逸豫一日萬幾留心親覽匪曰朕躬益為百姓故也王公卿士每日闕庭刺史以下歲時朝集何嘗不罄竭心腑誠教殷勤義乃君臣情兼父子庶藉百寮之智安率土之民不謂遺疾彌留至於大漸但四海百姓衣食不豐教化政刑猶未盡洽興言念此唯以留恨朕今踰六十不復稱夭但筋力精神一時勞竭欲安養百姓所以致此人生子孫誰不念愛既為天下事須割情勇及秀等並懷悖惡既無臣子之心所以

黜廢古人有云知臣莫若君知子莫若父令勇秀得志
共理家國亦當戮辱遍公卿酷毒流民庶今惡子孫已
為百姓黜屏好子孫足堪負荷大業此雖朕家事理不
容隱皇太子廣地居上嗣堪承朕志內外同心共安天
下朕雖瞑目何所復恨國家大事不可限以常禮既葵
公除行之自昔今宜遵用不勞改定凶禮所須纔令周
事務從儉約不得勞人諸州總管刺史以下宜率其職
不須奔赴自古哲王因人作法前帝後帝沿革隨時律

令格式有不便於事者宜依前脩改務當政要嗚呼敬
之哉無墜朕命乙卯發喪河間楊柳四株無故黃落既
而花葉復生八月丁卯梓宮至自仁壽宮丙子殯於大
興前殿諡曰文皇帝廟號高祖十月乙卯葬太陵

宋揮塵錄曰太祖乾德四年詔置三戶歲一饗以太
牢

同墳異穴士庶赴奠者皆聽入視陵內帝性嚴重有威
容外質木而內明敏有大略得政之始羣情不附諸子

幼弱內有六王之謀外致三方之亂握強兵居重鎮者
皆周之舊臣帝推以赤心各盡其用不踰期月尅定三
邊未及十年平一四海薄賦輕刑內脩制度外撫戎夷
每旦聽朝日昃忘倦居處服翫務存節儉令行禁止上
下化之開皇仁壽間丈夫不衣綾綺無金玉之飾常服
率多布帛裝帶不過銅鐵骨角而已雖畷於財賞賜有
功亦無所愛惜

隋書食貨志曰帝躬履儉約六宮咸服澣濯之衣乘

與供銜有故敝者隨令補用皆不改作非宴享事所
食不過一肉有司嘗進香用繻袋笞所司戒後由是
內外率職府帑充實百官祿賜及賞功臣皆出豐厚
九年陳平親御朱雀門因行慶賞自門外夾道列金
帛之積達於南郭以次頒給所費三百餘萬段給復
江表十年諸州並免當年租賦十年五月又以宇內
無事益寬徭賦十二年有司上言庫藏皆滿帝曰朕
薄賦於人又大經賜用何得爾也對曰用處常出納

處常入乃更闢左藏院構屋受之下詔曰既富而教
方知廉耻寧積於人無藏府庫河北河東今年田租
三分減一兵減半庸調全免

每乘輿四出路途上表者駐馬親自臨問或潛遣行人
采聽風俗吏民得失民間疾苦無不留意嘗遇關中飢
遣左右視民所食有得豆屑雜康奏者帝流涕示羣臣
深自咎責為損膳不御酒肉者將一期及東拜泰山關
中戶口就食洛陽者道路相屬帝敕斥候不得驅逼男

女參厠伏衛間遇逢扶老携幼者輒引馬避之慰勉而去至艱險處見負擔者遽令左右扶助之將士戰歿必加優賞仍令使者就家勞問自強不息朝夕孜孜民庶殷繁帑藏允實雖未能致臻至道亦近代良主然雅性沈猜素無學術好為小數言神燭聖杖堪能療病又信王劬解石文以為已瑞不達大體於是故忠臣義士莫得盡行蠲辭其草創元勳及有功諸將誅夷獲罪罕有存者又不悅詩書揚素希旨遂奉除學校唯婦言是聽

廢黜諸子逮於暮年持法尤峻喜怒失常果於殺戮常令左右送西域朝貢使出關其所經處受收宰所饋鸚鵡麋皮馬鞭小物聞而大怒又詣武庫見署中燕穢不理於是執武庫令及諸受遺者出開遠門外親自臨決死者數十人又往往潛令賄遺令史府史受者必死議者以此少之

資治通鑑曰帝晚節用法益峻御史於元日不劾武官衣劍不齊者帝曰爾為御史縱捨自由命殺之諫

議大夫毛思祖諫又殺之將作寺丞以課麥麴遲晚
武庫令以署庭荒蕪左右出使或授牧宰馬鞭鷄鴝
帝察知並親臨斬之帝既喜怒不恒不依科律信任
楊素素復任情不平與鴻臚少卿陳延有隙嘗經著
客館庭中有馬尿又太僕於氈上擣蒲以白帝帝大
怒主客令及擣蒲者皆杖殺之捶陳延幾死帝遣親
衛大都督長安屈突通往隴西檢覆羣牧得隱匿馬
二萬餘匹帝大怒將斬太僕卿慕容悉達及諸監官

千五百人通諫曰人命至重陛下柰何以畜產故殺
千有餘人臣敢以死請帝瞋目叱之通又頓首曰臣
一身分死就陛下旬千餘人命帝感寤曰朕不明至
此賴卿忠言耳悉達等皆減死論擢通左武侯將軍
隋書刑法志曰帝尚慘急而奸回不止京師白日公
行劫盜命盜一錢以上皆棄市此後又定制行署取
一錢以上聞見不告言者罪至死自此四人共盜一
棖桷三人同竊一瓜事發卽決有數人劫執事謂之

曰吾豈求財者為狂人來耳而為我奏至尊自古體
國立法未有盜一錢卽死者而不為我上聞吾更來
而屬無遺類矣帝聞為停此法

論曰文帝樹基立本積德累仁

二語不切不如用隋書龍德在田奇表見異二語

徒以外戚之尊受托孤之任與能之議未為所許是以
周室舊臣咸懷憤惋既而王謙固三蜀之阻不踰期月
尉遲迴舉全齊之衆一戰而亡非止人謀抑亦天贊乘

茲機運遂遷周鼎于時蠻夷猾夏荆揚未一劬勞日昃
經營四方樓船南邁則金陵失險驃騎北指則單于款
塞職方所載並入疆理禹貢所圖咸受正朔雖晉武克
平吳會漢宣推亾固存不能尚也七德旣敷九歌已洽
尉候無警遐邇肅清於是躬節儉平徭賦倉廩實法令
行君子樂生小人安業強不凌弱衆不暴寡民物殷阜
朝野歡娛自開皇二十年間天下無事區宇晏如也但
素無術業不能盡下無寬仁之度有刻薄之資暨乎暮

年此風愈扇又雅好瑞符暗於大道建彼維城權侂京
室皆同帝制靡所適從聽妬婦之言惑邪臣之說溺寵
廢嫡託付失所滅父子之道開昆弟之隙縱其尋斧翦
代本墳土未乾子孫繼踵為戮松檟纒列天下已非隋
有惜哉迹其衰怠之源稽其亂亡之兆起自文皇成於
煬帝所由來遠矣不祀忽諸未為不幸也

南北史合注卷九十七